

EL PASSARIN

Ghe l'avevi lì inscì bell,
bell, drizz e sbarlusént
e inscì vîscor
che l'era on piasè guardall.
Ma intanta che l'è on poo
che son lì a rimirall
tutt content – vardel là! –
el comincia a sbassà el coo.

Minga per nient, foo mì,
o mè fringuell,
te fee ancamò bell ved,
te gh'ee anmò on'aria de contegn...
Ma in quella, giò on alter basèll.

Sarà stada l'emozion,
sarà staa che anca lu,
no essend pù primavera
el gh'aveva i sò reson,
fatto è che adess
el someia a on passarin
che... (fo no per rid, l'è vera)
cipp-cipp, cipp-cipp – alter che ciapp! –
el faseva con on fil de vos
che quasi no se sentiva.

De ch'el pass chì, gh'ho ditt,
car el me amis, vola pur via

o almen tas.
Cos'l'è sta cojonada
Toeu sù, vola via e lassom in pas.